

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 257134 25 St  
Zenica, 09.06.2026. godine

Općinski sud u Zenici, stečajni sudija Samra Spahić-Drino, u stečajnom postupku nad stečajnim dužnikom EXTRA“ Društvo za unutrašnju i spoljnu trgovinu d.o.o. Tešanj, ul. Maršala Tita broj 7, Tešanj, koji je pokrenut po prijedlogu predlagača EXTRA d.o.o. Tešanj, ul. Maršala Tita broj 7, Tešanj, kojeg zastupa Alemdar Brkić, advokat iz Tešnja, nakon održanog ročišta 12.03.2026. godine, kojem su prisustvovali privremeni stečajni upravnik Hadžimehić Muris i punomoćnik predlagača, van ročišta, dana 09.06.2026. godine donio je:

## R J E Š E N J E

Otvara se i zaključuje stečajni postupak nad stečajnim dužnikom „EXTRA“ Društvo za unutrašnju i spoljnu trgovinu d.o.o. Tešanj, ul. Maršala Tita broj 7, Tešanj, matični registarski broj subjekta upisa 1-6944, zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 1-6944, po pravomoćnosti ovoga rješenja.

## O b r a z l o ž e n j e

Prijedlogom od 21.02.2025. godine predlagač EXTRA“ Društvo za unutrašnju i spoljnu trgovinu d.o.o. Tešanj, ul. Maršala Tita broj 7, Tešanj, podnio je ovom sudu prijedlog za otvaranje stečajnog postupka nad navedenim društvom zbog platežne nesposobnosti.

Rješenjem ovog suda od 11.11.2025. godine pokrenut je prethodni postupak za utvrđivanje uvjeta za otvaranje stečajnog postupka nad navedenim društvom, te je radi utvrđivanja uvjeta za otvaranje stečajnog postupka nad ovim društvom za privremenog stečajnog upravnika imenovan Hadžimehić Muris iz Tešnja.

Iz Izvještaja privremenog stečajnog upravnika, koji je dostavljen sudu 08.12.2025. godine proizilazi da je privremeni stečajni upravnik dao zaključke da prema podacima finansijskih izvještaja koji su dostavljeni društvo nema pokretne ili nepokretne imovine, da od ostale imovine prema bilansu stanja od 31.12.2024. godine ima iskazanu imovinu u iznosu od 2.000,00 KM koja ne postoji, da društvo ne posjeduje bilo kakav oblik imovine što se slaže sa stanjem prilikom obilaska bivših prostorija sjedišta društva, te nije bilo potrebe poduzimati mjere za zaštitu imovine društva jer ista ne postoji. Dalje je naveo da postoji razlog za otvaranje i vođenje stečajnog postupka zbog platežne nesposobnosti društva, ali ne postoji uslov za otvaranje i vođenje stečajnog postupka jer društvo nema bilo kakvu imovinu u bilo kojem obliku. Naveo je da društvo nema uslove za nastavak poslovanja u cjelini ili djelimično, jer ne obavlja bilo kakvu poslovnu djelatnost duži niz godina, ima blokirane transakcijske račune 13 godina i ne posjeduje imovinu sa kojom bi se moglo nastaviti poslovanje. Prijedlog za otvaranje stečajnog postupka nije podnesen u roku od 60 dana od dana nastupanja platežne nesposobnosti.

Privremeni stečajni upravnik je na ročištu održanom 12.03.2026. godine ostao u cijelosti kod navoda iz izvještaja od 08.12.2025. godine, da je kao privremeni stečajni upravnik pregledom dostupnih poslovnih knjiga i podataka iz javnih registara utvrdio da društvo nema imovinu u obliku nekretnina niti pokretnu imovinu koja bi mogla činiti stečajnu masu, da je osnovna djelatnost društva bila trgovina na malo u nespecijaliziranim prodavnicama pretežno hranom, pićima i duhanskim proizvodima, da je sjedište društva bilo u zakupljenom prostoru koje je u vlasništvu fizičkog lica, na adresi Maršala Tita 7, Općina Tešanj, broj parcele 930 K.O. Tešanj, gdje je bila smještena kancelarija, a stvarnu djelatnost je obavljalo na adresi Gazi Ferhad-bega 10, Općina Tešanj u iznajmljenom poslovnom prostoru u vlasništvu fizičkog lica. Problemi sa likvidnošću i problemi u poslovanju su se počeli javljati tokom 2012. godine što je rezultiralo blokadom računa u Sparkasse banci 23.02.2012. godine koja traje do današnjeg dana. Prema podacima iz bilansa stanja od 31.12.2024. godine, društvo nema nekretnina u

svome vlasništvu, ne posjeduje motorna vozila, a od ostale imovine prema bilansu stanja od 31.12.2024. godine ima iskazanu imovinu u iznosu od 2.000,00 KM, ali koja ne postoji i društvo ne posjeduje bilo kakav oblik imovine što se slaže sa stanjem koje je konstatovano prilikom obilaska bivših poslovnih prostorija tj. sjedišta društva. Prema bilansu stanja od 31.12.2024. godine pozicije aktive društva su bile: novac i novčani ekvivalenti 2.000,00 KM, a bilansne pozicije pasive: kapital koji pripada vlasnicima matičnog društva 2.000,00 KM. Izjavio je da postoji razlog za otvaranje stečajnog postupka iz razloga platežne nesposobnosti društva, da društvo nema imovinu da pokrije predviđene troškove stečajnog postupka, pa predlaže da sud otvori stečajni postupak u skladu sa članom 102. stav 7. Zakona o stečaju („Službene novine FBiH“ broj 53/21), ukoliko netko od zainteresovanih povjerilaca predujmi troškove postupka u iznosu od 5.000,00 KM, a ako u roku iz člana 102. stav 7. povjerioci ili zainteresovana lica ne predlože otvaranje stečajnog postupka i ne uplate predujam, predlaže postupanje po članu 102. stav 8. Izjavio je da je podnosilac prijedloga za otvaranje stečajnog postupka stečajni dužnik, a prijedlog za otvaranje stečajnog postupka nije podnesen u roku od 60 dana od dana nastupanja platežne nesposobnosti član 61. stav 2. tačka b. Zakona o stečaju („Službene novine FBiH“ broj 53/21), koja platežna nesposobnost je nastupila 23.04.2012. godine. Punomoćnik predlagača izjavio je da nema primjedbi niti prigovora na izvještaj.

Sud je donio odluku kao u izreci iz sljedećih razloga.

Odredbom člana 102. stav 6. Zakona o stečaju („Službene novine F BiH”, broj: 53/21) propisano je da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka, dok je stav 7. istog člana propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u „Službenim novinama Federacije BiH“, pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija. Stavom 8. istog člana propisano je da ako u roku iz stava 7. ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak.

Imajući u vidu prethodno navedeno, sud je primjenom odredbe člana 102. stav 7. Zakona o stečaju, rješenjem od 12.03.2026. godine pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 4.000,00 KM, te da po izvršenoj uplati predujma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupka.

Rješenje ovog suda od 12.03.2026. godine objavljeno je na oglasnoj tabli suda 13.03.2026. godine, na web stranici suda 12.03.2026. godine i u „Službenim novinama Federacije BiH“ broj: 22 od 25.03.2026. godine.

Kako stečajni dužnik ima obaveze, dok nema imovine u dovoljno iznosu za namirenje troškova stečajnog postupka, a povjerioci i zainteresovana lica po proteku roka ostavljenog u rješenju donesenom od strane ovog suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečajnom postupku, odlučeno kao u izreci ovog rješenja.

Shodno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje uslijed nedostatka mase prestaje postojati, te brisanje ovog pravnog lica iz sudskog registra.

#### POUKA O PRAVNOM LIJEKU

Protiv ovog rješenja može se izjaviti žalba u roku od 8 dana od dana dostavljanja, Kantonalnom sudu u Zenici putem ovog suda u tri primjerka.

Stečajni sudija

Samra Spahić-Drino